



A San Murezzan duaian avair lieu tranter auter las disciplinas da skis alpin dals Gieus olimpics d'enviern 2022... ed a Tavau duaian avair lieu tranter auter las disciplinas da snowboard ed ils gieus da hockey.

«Be cun respect visavi la natira ed ils umans»

Gieus olimpics d'enviern 2022 en il Grischun

DA GION NUTEGN STGIER / ANR

■ **Gieus che van a prà cun il Grischun. Quai vulan ils promoturs da l'Olimpiada d'enviern 2022 en il Grischun organisar. Actualmain examineschan spezialists da divers secturs sche gieus olimpics en noss chantun èn insumma realisabels.** Resultats concrets han ins fin ussa nagins, dentant exista gia il logo per l'event internaziunal en il Grischun.

L'associaziun che vul organisar il 2022 gieus olimpics en noss chantun e quai a San Murezzan ed a Tavau ha envidà ier ils meds da massa per preschentar il team che duai examinar la realisabladad da Gieus olimpics d'enviern en noss chantun. A la testa da quel team è il grischun *Gian Gilli* che ha ditg che l'associaziun veglia unicamain candidar per ils gieus sche quels gajan a prà cun il Grischun. Uschè circumscriva l'Engiadinais e directur da l'associaziun la finamira da l'analisa da realisabladad che vegn elavurada da preschent. Spezialists da differents secturs sajan actualmain vidlonder d'examinar betg mo sch'ils Gieus olimpics d'enviern sajan realisabels dal punct da vista logistic ed organisatoric, mabain tegnan quint er da las consequenzas duravlas d'ina tala occurrenza gronda. «Nus vulain organisar ils Gieus olimpics d'enviern cun il motto «nossas muntognas, noss gieus e noss futur», ha accentuà Gian Gilli. Da preschent vegnan evaluads ils basegns, ils lieus ed ils custs dals implants da sport existents e da quels che ston vegnir bajegiads da nov. Architectes ed inschigners indigens da San Murezzan e Tavau examineschan en collavuraziun cun spezialists locals e las autoritads sch'ils edifizis ed implants necessaris pon vegnir realisads en tuts dus lieus sin fun-

dament da las relaziuns da plaz limitadas e sche quels pon vegnir nizzegiads era pli tard.

Betg pli grondas dimensiuns

Rainer Quenzer è in architect cun ina gronda experienscha quai che pertutga concepts d'implants da sport. Er el appartegna a quel team che duai examinar la realisaziun da l'occurrenza internaziunala en noss chantun. «Sunter ils gieus vegnan mantegnids mo ils implants da sport, ils edifizis e las infrastrukturas che pon vegnir duvradas ed administradas a moda adequata e cun cust ruschanaivels», ha menziunà Rainer Quenzer. Tuts ils auters implants duaian vegnir concepids ch'els pon vegnir allontanads suenter ils gieus e duvrads sche pussaivel en in auter lieu. Quai vegnia gia pratitga quest onn suenter ils Gieus olimpics da stad a Londra, nua che quatter implants da sport vegnan suenter l'event demontads e quatter onns pli tard tar ils Gieus olimpics da stad a Rio de Janeiro puspè duvrads. Rainer Quenzer ha er ditg che gieus olimpics hajan betg pli grondas dimensiuns, mabain be dapli disciplinas che per exempel in Campiunadi mundial da skis. En quel senn saja pussaivel da manar tras a San Murezzan las occurrenzas da skis alpin senza realisar blers novs implants. Nus lain er avair quità da la natira uschè che quella vegn betg donnagiada antras ils novs implants, ha ditg il spezialist.

Gia il november duai decider il suveran grischun

La dumonda da segirezza da gieus olimpics en il Grischun vegn examinada da *Martin Jäggi*, l'antieriur cumandant da pulizia dal chantun da Soluturn e schef da segirezza da l'Euro 08. Examinads

vegnan natiralmain er ils effects positivs e duravels ch'ina candidatura ed ina realisaziun dals Gieus olimpics d'enviern pudessan avair per il Grischun e la Svizra. En quella chausa duaian vegnir a pled tant ils aderents sco er ils adversaris dals gieus olimpics en noss chantun, ha ditg Gian Gilli. Gia ussa saja l'interess per innovaziuns en connex cun quel event avant maun, ha el er anc ditg. La candidatura duai vegnir finanziaada per min-

tgamai in terz da la confederaziun, dals chantuns/da las vischnancas e da l'economia privata svizra. Gieus olimpics d'enviern sajan er ina schanza per l'economia svizra da sa preschentar sin champ internaziunal, ha ditg Gian Gilli. Ina candidatura grischuna haja mo ina schanza sche la populaziun vesia che nus procedin cun quità e cun respect visavi la natira ed ils umans en noss chantun, ha ditg *Christian Gartmann* a la fin da la

conferenza da pressa. Sche tut va tenor plan duai il suveran grischun gia decider ils 25 da november 2012 per ubain cunter Gieus olimpics d'enviern 2022 en noss chantun. Fin lura è segir er il logo enconuscent a blers, in logo cun in capricorn pusà sin la crusch svizra ed en las colurs da San Murezzan e da Tavau e dals rintgs olimpics. Ultra da quai cumpiglia il logo er las trais linguas da noss chantun, tudestg, talian e rumantsch.

reclama



Unsere volle Unterstützung im Endspurt.

swisski

OFFIZIELLER SPONSOR

Sponsoring – Unser Beitrag zu Spitzenleistungen.

Ihre Schweizer Versicherung.

helvetia



GRISCHUN 2022

Il logo en las colurs dals dus lieus San Murezzan e Tavau ed en las colurs dals tschintg rintgs olimpics.

FOTOS SWISS-IMAGE/MAD